

SEN REMUDA Cesáreo Sánchez renovará mañá á fronte da Asociación de Escritores en Lingua Galega, que celebra a súa asemblea de socios

Mellor consolidados

"Agardamos que na próxima lexislatura o futuro presidente da Xunta nos reciba", asegura o poeta


V. Oliveira · Santiago

O poeta ourensán Cesáreo Sánchez, pedirá mañá o apoio dos socios da Asociación de Escritores en Lingua Galega (AELG) para continuar á fronte do colectivo logo de que remudase no cargo a Euloxio Ruibal en 2005. Tras ser reelixido hai dous anos, Cesáreo Sánchez adiantou onte que o consello directivo contará con dous novos membros: os autores Francisco Castro e Elvira Riveiro.

Outro dos puntos da orde do día que se tratarán na Asemblea anual de socios da AELG que se celebrará a partir das 11.00 horas no Salón de Actos do Centro Galego de Arte Contemporánea (CGAC), será a presentación do informe económico e de actividades do ano pasado.

O presidente da AELG fai un "balance especialmente positivo" do 2008 xa que a asociación "está máis consolidada ano a ano, medra a presenza social dos escritores, temos unha web con 3.000 entradas diarias e cada vez máis, os autores teñen maior presenza social", apunta.

Ao seu ver, "é importante que a estrutura da asociación se foi consolidando nestes anos, e agrádecese a implicación de todos os asociados", engade. Cesáreo Sánchez tamén destaca que "aumentaron



Cesáreo Sánchez foi elixido presidente da Asociación de Escritores en Lingua Galega en 2005

NOVIDADES

Potenciación das polafías

Entre as novidades que este ano terán lugar na Asociación, Cesáreo Sánchez apuntou que haberá algunhas modificacións nos galardóns, celebrarase un encontro sobre a literatura no ensino e tamén se van potenciar as polafías, que é "unha sección moi activa da asociación".

os fondos" cos que conta a súa web á que se irá incorporando novo material como "o inventario das casas dos escritores" impulsado pola Consellería de Cultura.

A Asemblea da AELG tamén presentará as actividades para este ano que se someterán á votación dos socios, entre as que non faltarán a participación dos escritores galegos no Galeusca que este ano se celebra en Euskadi, o encontro de novos autores e os principais premios que conceden como 'Os bos e xenerosos', 'O escritor

na súa terra' (Letra E) ou o 'Escritor Galego Universal' que este ano recaeu na mexicana Elena Poniatowska e o ano pasado na cubana Nancy Morejón. Poniatowska recollerá a distinción na Cea das Letras que a AELG celebrará en maio deste ano.

Malia valorar os esforzos acometidos dende a Administración pública pola visibilización dos escritores, Cesáreo Sánchez agarda que "na próxima lexislatura o futuro presidente da Xunta nos reciba, xa que nesta non foi posible". ●